

劉傷傷

河

間

傷

寒

醫

寒

證

脈

藥

截

江


金

網

要

鑿





劉河間傷寒醫鑒

馬宗素撰

叢書集成初編

(補印本)

劉河間傷寒醫鑒及其其他三種

一九三九年十二月初版
一九六〇年一月補印

商務印書館出版

上海市印刷六廠印刷

劉河間傷寒醫鑒

傷寒醫鑒

元 平陽馬宗素撰

天道有遭世而興。事有遇時而顯。此古今之常理。出於自然者也。且謂儒書衰滅以後。邪說蜂起。以淆亂六經之道。紅紫亂朱。無以折衷。孝武帝舉用俊茂。罷黜百家之非。而六經之道始明。自漢而降。註述繁錯。醫書尤甚。況醫乃人之司命。所係尤重。殆非小智所能及也。惟昔黃帝岐伯。難疑答問。上窮天道。下極地理。中盡人性。垂法萬世。以爲生民之壽域。是以名曰素問。於是守真劉先生。恐斯文將墜於地。民罹橫夭。於是分天地陰陽。剛柔消長之理。察人生風氣血脈寒熱之宜。逐一擬一篇。無不引素問。先標受病之本源。所處方用藥。注書有四焉。一者明天地之造化。論運化之盛衰。目之曰要旨論。一部計三萬六千七百五十三字。一者分君臣之佐使。定奇耦之逆從。又作宣明論一部。計八千九百零三字。一者又註傷寒六經傳受直格。一部計一萬七千零九字。又取至真要論一篇。病機氣宜之說。著玄機原病式一帙。計二萬餘言。又先生歸世之後。恐樞要於宣明論內。又集緊切藥方六十道。分爲六門。亦名直格。通計八萬餘言。可謂勤矣。守真曰。自昔以來。惟仲景註述遺文。立傷寒九十七法。合一百一十二方。後學者莫能宗之。謂如人病傷風。則用桂枝解肌。傷寒則用麻黃發汗。傷風反用麻黃。則致強項柔痙。傷寒反用桂枝。則作驚狂發斑。或誤服此二藥。則必死矣。故仲景曰。桂枝下咽。陽勝則斃。承氣入胃。陰盛則亡。是

也。守真爲此慮。恐麻黃桂枝之誤。遂處變解散。無間傷風傷寒。內外諸邪。皆能治療。從下證錯汗者。亦不爲害。如此革誤人之弊。已不少矣。仲景處大承氣湯。小承氣湯。調胃承氣湯。亦各有所宜。熱勢大者。大承氣主之。微者。小承氣主之。胸中有痛大便澇者。調胃承氣主之。守真又恐承氣有三。恐有過焉不及之患。遂處三一承氣以總之。又慮仲景所著之書。文深義奧。淺學難通。遂芟其枝蔓。撮其本根。十去七八。將三百九十七法。一百一十二方。制三十二藥而總之。使人易於檢閱。一見此書。對形見影。了無障礙。得之對證用藥。人可自療。況醫家者流。業此者乎。兼仲景除傷寒之外。亦無雜病之論。是已備於仲景書也。故守真首論傷寒之差謬。故一切內外所傷。俱有受汗之病。名曰熱病。通謂之傷寒。今春溫夏熱。秋涼冬寒。是隨四時天氣所感輕重。及主療消息不等。合而言之。則一也。冬伏寒邪。藏於肌肉之間。至春變爲溫病。夏變爲暑病。秋變爲濕病。冬變爲正傷寒。冬冒其氣而內生怫熱。微而不病者。以至將來陽熱變動。或又感之而成熱病也。經曰。冬傷於寒。春必病溫。亦其義也。然其陰證者。止爲雜病。終不爲汗病。由是傷寒汗病。直言熱病。不言其有寒也。三陰證者。邪熱在臟裏。以臟爲裏。爲陰。當下者是也。素問三篇。刺熱評熱。兼雜病論熱。不說其寒。非無謂者也。熱論之外。素問更無說傷寒之證。熱論云。熱病者。皆傷寒之類也。又云。人之傷於寒也。則爲熱病。注云。寒者冬氣也。冬時嚴寒。萬類深藏。固密不傷。於寒觸冒之者。名曰傷寒。傷於四時之氣。皆能病。以傷寒爲毒者。最爲殺厲之氣。中而卽病。名曰傷寒。不卽病者。寒毒藏於肌肉間。久而不去。變爲熱病。故曰熱病者。傷寒之類也。古聖訓陰陽爲表裏。此一經大節目。惟仲景深得其旨趣。厥後

朱肱編活人書將陰陽二字釋作寒熱。此差之甚也。中間誤羅橫天。嗟之何及。素問言人之臟腑陰陽。臟者爲陰。腑者爲陽。又四時陰陽。盡有經紀。內外之應。皆表裏。其信然乎。六合爲十二經脈之合。太陰陽明爲一合。厥陰少陽爲一合。少陰太陽爲一合。手足之脈是謂六合。表裏者。諸陽脈皆爲表。諸陰脈皆爲裏。以此驗之。是守真之言不誣矣。然恐俗人不悟。朱肱活人書之謬。且略舉傷寒六經傳受一端而明之。肱書云。傷寒中病時。腠理寒。便入陰經。脈不微細。不經三陽也。三陰中寒。微則下理中湯。稍厥或下利。卽乾姜甘草湯。若陰毒已深。病勢困重。六脈附骨取之方有。按之則無。於臍中用葱熨法。或灸艾三五百壯。以來。手足不溫者。不可治也。守真曰。前三日三陽病在表。故當汗之。後三日三陰病在裏。故當下之。六經傳受。皆是熱證。非有陰寒之病也。素問云。傷寒未滿三日者。可汗而已。其滿三日者。可泄而已。由此言之。守真之說。正合素問。肱書失之遠矣。又如身冷脈微。陽厥極深一證。肱書云。病人身冷脈沉細而疾。或時鄭聲。指甲面色青黑。陰毒已深。若服涼藥。則渴轉甚。躁轉急。須急服辛熱之藥。如得手足溫。更服前熱藥。助之。若陰氣散。陽氣來。卽漸減熱藥而調之。守真曰。傷寒下後熱不退。畜熱在內。陽厥極深。以至陽氣怫鬱。不能營運於身表四肢。以至遍身清冷。若急下之。真陰暴絕。陽氣後竭而立死。不下亦死。此際當以涼膈散。或解毒養陰退陽。但欲畜熱漸散。則心胸復暖。脈自漸生。至於脈復有力。方可三一承氣湯下之。守真復慮熱有兩感說。復以素問證之曰。亢則害。承乃制。此則正謂陽厥極深。不能營運於四肢。以至身冷脈微也。此略舉一二端耳。餘者之謬。自可觸類。夫肱書暴於當世。亦一代之名醫。其誤謬猶若是。況其餘碎

雜不經之說。何可盡信。至論小兒如閻孝忠曰。凡小兒瘡疹當乳母慎口。不可令饑。及受風冷。歸腎變黑。而難治。春夏病爲順。秋冬病爲逆。冬月腎旺盛寒。多歸腎變黑。若妄下之。則內虛。多歸於腎。此則直以瘡疹爲寒。守真云。閻孝忠不詳錢氏本方。斑疹黑陷。牛李膏。百祥丸。寒藥下之。多獲痊。不救必死。爲熱豈不明哉。經云。諸痛痒瘡瘍。皆屬心火。及斑瘡黑陷。無不腹滿喘急。小便赤澀不通。豈非熱極使然耶。此閻孝忠所以失錢氏之意也。守真如此分別。可謂醫者之龜鑑也。學者當詳其說。無妄謂傷寒有陰毒之證。便投姜附之藥。使實實虛虛。損不足。益有餘。以此誤人。不亦冤哉。每觀乎城翟公序曰。譬如宵行冥冥。迷路不知其往。遇明燈炬火。正路昭然。此醫鑑之所作也。然世俗惡寒好熱。蓋亦有說。守真云。病勢輕微。以熱藥強劫開發。誤中而獲効者有矣。如中酒有熱毒而復飲熱酒以投之。令鬱結得開。而氣液宣通。此謂以熱治熱。亦有痊者。世俗惑於病輕而易痊。謂大疾亦然。殊不知不中則反爲害也。熱病以熱藥治之者。譬如驕主得佞臣。縱恣禍及滅亡。更不覺佞臣之惡。惟其同好之可樂。使熱勢轉甚。以至陽厥身冷脈微。反陽爲陰。雖死不悟。至於諸熱變證。十損八九。莫不皆然也。如下利不止。痰熱在裏。若使火艾熨烙。無不悅者也。此世俗好寒惡熱。所以滋眩書之失也。又守真云。病勢熱甚。而依法治之不退者。或失寒涼。或因失下。或熨烙熏灸。使熱極而妄爲陽厥。切不可用銀粉。巴豆性熱大毒。熱燥丸藥下之。反耗損陰氣。而衰竭津液。使熱勢轉甚。而懊憹喘滿。結胸腹痛。下利不止。血溢。血泄。或爲淋閉。驚狂譫妄。熱證蜂起。不可勝舉。由此爲癥。癥堅積之疾。誤人必多。然則世情亦不知醫者之過。未盡究守真之奇效。嘗聞守真之言曰。正

治者以寒治熱。以熱治寒。病證輕微。可如此治之。若病重危。則當從反治之法。其反治者。亦名從治。蓋藥氣從順於病氣也。是故以熱治熱。以寒治寒。是謂反治。以熱治熱者。非謂病氣熱甚。而更以熱性之藥治之。本謂寒性之藥。反佐而服之。蓋謂病氣熱甚。藥氣寒甚。拒其藥寒。則寒攻不入。寒熱交爭。則其病轉加也。故用寒藥。反熱佐而服之。令藥氣與病氣不相忤。其藥本寒。熱服下咽之後。熱體既消。寒性乃發。由是病氣隨愈。餘皆倣此。然正治之法。猶君刑臣過。逆其臣性而刑之。故病熱不甚。治之以寒。逆其病氣而病自愈矣。反治之法。猶臣諫君。非順其君性而以悅之。其始則從。其終則逆。可以諫君去其邪而歸於正。王冰曰。病水猶人火。火得草則熳。得木則燔。得水而滅。病火猶救龍火。然濕而燔。得水而熳。以人火不繞逐之。則其火自滅耳。此謂良醫之治法也。夫逆治從治。皆是違性之藥。病人豈有不惡者。是藥病相爭。其氣所以得固也。然十救其十。亦不爲醫之功。以謂人之有命也。如身冷脈微。終不省畜熱在內。設以涼膈解毒之藥調治。無有不惡。又如患形不至。有經年終不曉瘕熱在裏。設以承氣寒藥下之。無有不畏。雖得痊愈。尙不免於畏惡。病勢大藥力小。而致死者。亦不知杯水救車薪之火爲非。只指爲用涼藥之過。此二者無他。存於世人。是非不明。而惡寒好熱也。

論脈證

活人書。陰毒脈疾七至八至以上。疾不可數者。正是陰毒已深也。六脈沉細而疾。尺部斷小。寸口脈或大。若誤服涼藥。則渴轉急。有此之證者。便急服辛熱之藥。一日或二日便安。若陰毒漸深。其候沉重。四肢首

冷腹痛轉甚。或咽喉不利。心下脹滿結硬。燥渴。虛汗不止。六脈但沉細而疾。一息七至以來。有此證者。速於氣海關元二穴。灸三二百壯。以手足和煖爲効。仍兼服正陽散。

守真云。然既脈疾至七至八以上。疾不可數者。正是陽熱極甚之脈也。世俗妄傳陰毒諸證。以素問驗之。皆陽熱亢極之證。但熱於內在裏極深。身表似其陰寒者也。及夫經云。亢則害。承乃制也。謂五行之道。實甚則過極。則反似尅已者也。是謂兼化。如萬物熱極而反出水液。以火煉金。熱極而反化爲水。是以火極而反以水化也。

素問脈要精微論。長則氣治。短則氣病。數則心煩。大則病進。註曰。致急則熱。故煩心也。又云。節藏象論。人迎一盛病在少陽。二盛病在太陽。三盛病在陽明。四盛病已。上爲格陽。註云。謂人迎脈於寸口一倍。餘盛同法。又云。俱盛謂大於平常之脈四倍也。四倍以上爲關格之脈。人羸不能極於天地之精氣。則死矣。

論六經傳受

活人書。太陰少陰厥陰。皆屬陰證也。少陰者腎也。厥陰者肝也。太陰者脾也。何謂太陰。太陰者脾之經。主胸膈臑脹。何謂少陰。少陰者腎之經。主脈微細。主心煩欲寐。或自利而渴者。何也。謂中病時。腠理寒。便入陰經。不經三陽也。蓋氣入於大腸。則發熱而惡寒。入於少陰。只惡寒而不發熱也。三陰中寒。微則理中湯。稍厥。或中寒下利。卽乾薑甘草。大段重者。四逆湯。無脈者。通脈四逆湯。何謂厥陰者。肝之經也。厥陰之爲主。主消渴。氣上衝。心中痛熱。餓不欲食。食則吐衄。下之利不止也。若陰氣獨盛。陽氣暴絕。則爲陰毒。其證

四肢逆冷。腹臍築痛。身如被杖。脈沉疾。或吐或利。當急灸臍下。服以辛熱之藥。令陽復而大汗矣。守真曰。人之傷寒則爲熱病。古今一同。通謂之傷寒。病前三日。巨陽陽明少陽受之。熱在於表。汗之則愈。後三日。太陰少陰厥陰受之。熱傳於裏。下之則愈。六經傳受。由淺至深。皆是熱證。非有陰寒之證。古聖訓陰陽爲表裏。惟仲景深得其意。厥後朱肱編活人書。特失仲景本意。將陰陽二字。釋作寒熱。此差之毫釐。失之千里矣。

素問熱論云。黃帝問曰。熱病者。皆傷寒之類也。或愈或死。皆以六七日之間。其愈以十日以上者。何不知其解。願聞其故。岐伯曰。巨陽者。諸陽之屬也。其脈連於風府。故諸陽主氣也。人之傷寒也。則爲病熱。熱雖甚不死。其兩感於寒而病。必不能免於死矣。帝曰。願聞其狀。岐伯曰。傷寒一日。巨陽受之。故頭頂痛。腰背強。二日。陽明受之。陽明主肌肉。其脈夾鼻絡於目。故身熱。目痛。鼻乾。不得臥也。三日。少陽受之。少陽主膽。其脈循脇絡於目。故胸脇痛。而耳聾。三陽經絡皆受其病。而未入於臟。故可汗而已。四日。太陰受之。太陰脈布胃中。絡於噤。故腹滿而噤乾。故五日。少陰受之。少陰脈貫腎。絡於肺。系於舌本。故口燥舌乾而渴。六日。厥陰受之。脈循陰器而絡於肝。故煩滿而囊縮。三陰三陽五臟六腑皆受病。榮衛不行。五臟不通。則死矣。其不兩感於寒者。七日。巨陽病衰。頭痛少愈。八日。陽明病衰。身熱少愈。九日。少陽病衰。耳聾微開。十日。太陰病衰。腹滿如故。則思飲食。十一日。少陰病衰。渴止不滿。舌乾已而噤。十二日。厥陰病衰。囊縱。小腹微下。大氣皆去。病日已矣。帝曰。治之柰何。岐伯曰。治之各通其臟脈。病日衰矣。未滿三日。可汗而已。其滿三

日可下而已。

論汗下

活人書云。陽明證宜下。少陰證宜溫。又云。少陰病一二日。口中和。其背惡寒者。宜著艾。并四逆湯。又云。三陽證宜下。三陰證宜溫。少陰病發熱。脈沉。麻黃附子湯主之。少陰證二三日。常見少陰證。無陽者。宜麻黃附子皆陰證。表藥也。又云。發熱而惡寒者。發於陽也。麻黃桂枝湯主之。

守真云。夫辨傷寒陰陽之理者。邪熱在表。府病爲陽。邪熱在裏。臟病爲陰。世俗妄謂有寒熱陰陽之異。誤人多矣。寒病固有。然非汗病之謂也。止爲雜病。不可與汗病同科。且造化爲汗液之氣者。乃陽氣之氣。非陰寒之所能也。觀萬物熱極而反出水液。明可知也。況法曰。身熱爲熱在表。飲水爲熱在裏。其傷寒病本末身涼不渴。及小便不黃。脈不數者。未之有也。雖仲景有四逆湯證。表熱裏和。誤以寒藥下之太早。表熱未入於裏。裏寒下利不止。及表熱裏寒自利。急以四逆湯溫裏。利止裏和者。急於解表也。故仲景四逆湯證後。復有承氣湯寒藥下熱之說。由是傷寒汗病。經直言熱而不言其有寒也。經言三陽證者。邪熱在藏。在裏。以藏爲裏。爲陰。當下熱者是也。按素問論傷寒熱病三篇。皆名曰熱。竟無寒說。兼以靈樞諸經運氣之說推之。則明爲熱病。誠非寒也。

素問熱論云。帝曰。治之奈何。岐伯曰。治之各通其藏脈。病日衰已矣。其未滿三日。可汗而已。其滿三日。可泄而已。此言表裏之大體也。註曰。正理傷寒論脈大浮數。病在表。可發其汗。脈沉細數。病在裏。可下之。由

之正應脈證
而汗下之也。

論陽厥極深

活人書云。傷寒盛隔陽。病人身冷脈細沉疾。煩躁而不飲水者。又云。大抵陰毒本因腎氣虛寒。或因冷物傷脾。外感風寒。則陽氣下守。遂發頭痛腰重腹痛。眼睛疼。身體倦怠。四肢逆冷。汗不止。或多煩渴。精神恍惚。若誤服涼藥。則渴轉甚。躁轉急。有此病者。便須急服辛熱之藥。或時鄭聲。指甲面色青黑。若陰毒已深。病勢困重。六脈附骨取之。則有。按之即無。但於臍中用葱熨法。或着艾三百壯以來。手足不溫者。不可治也。

守真云。或下後熱不退。或畜熱內甚。陽厥極深。以至陽氣拂鬱。不能營運於身表四肢。以致遍身清冷。痛甚不堪。項背拘急。目睛赤痛。昏眩恍惚。咽乾或痛。燥渴虛汗。嘔吐下利。腹滿實痛。煩冤悶亂喘急。鄭聲。以其畜熱極深而脈道不利。以脈沉細欲絕者。俗未明其造化之理。而及傳爲陰毒。或失下熱極。以至身冷脈微而昏冒將死。若急下之。則殘陰暴絕。陽氣後竭而立死。不下亦死。病人至此。命懸傾刻。然則治法當何如。曰。此當涼膈散。或黃連解毒湯。養陰退陽。但欲畜熱漸漸宣散。則心胸復煖。脈漸以生。至於脈復有力。可以三一承氣湯微下之。或解毒加大承氣湯尤良。俗未明此。故認作陰證。是以陰陽失其治也。

素問五運行大論。岐伯曰。氣有餘則制已所勝。而侮所不勝。不及則已所不勝。侮而乘之。已所勝。輕而侮之。水餘則制土。輕侮於金。氣不爭。故木恃其餘而欺侮也。又木少金勝。土反傷木。以木不及。妄凌之也。四

氣本同。侮謂侮慢也。而凌忽之也。又云。以火煉金。熱極反化爲水。又云。亢則害。承乃制。

論燥濕發黃

活人書云。一身盡痛發熱身黃。小便不利。大便反快者。此名中濕。風雨襲虛。山澤蒸氣。人多中濕。濕留關節。須身體煩痛。其脈沉緩。內中濕也。主一身盡痛發熱身黃。小便不利。又云。以寒濕在表不解。爲不可下也。可以朮附湯主之。

守真云。發黃者。陽明裏熱極甚。煩渴熱鬱。留飲不散。以濕熱相搏而體發黃也。或言寒濕搏而發黃者。色及苔膏也。本傷寒失下。或誤汗之。溫之。灸之。熨之。或服銀粉巴豆大毒熱藥下之。反以亡液損其陰氣。邪熱轉甚。或下太早。熱入以成結胸。但發黃者。或失下。寒涼調治。或熱極本惡。雖按法治之。而不能退其熱。勢之甚者。或下後熱不退。皆能爲發黃也。大抵本因熱鬱極甚者。留飲不散。濕熱相搏。而以朮附湯主之。誤矣。

素問平人氣象論云。食已如餓者。胃疸。則是胃熱也。熱則消穀。食已如餓。目黃者。疸。陽怫於上。熱積胸中。陽氣燔上。故目黃也。

素問通評虛實論云。足之三陽。從頭走至足。然久厥逆而不下。以致怫積於上焦。故爲黃疸。

論不得眠

活人書云。下後復發汗。晝日煩躁不得眠。夜而安靜。不嘔不渴。無表證。脈沉微。身無大汗者。乾薑附子湯。

主之

守真云。夫傷寒病懊憹煩心。反復顛倒。不得眠者。燥熱怫鬱於內。而氣液不得宣通也。以梔子豉湯主之。素問刺熱篇云。肝熱甚。小便先黃。腹痛多臥。身熱。熱靜則狂言。及驚。脇滿痛。手足躁。不得眠也。

論嘔吐

活人書云。無陽則厥。無陰則嘔。却言少陰下利。脈微者。與白通湯。利不止。厥逆無脈乾嘔者。白通加豬膽汁湯主之。又云。膈上有寒。痰乾嘔者。不可吐。各溫之。宜四逆湯主之。

守真云。嘔者。火氣炎上之象也。故胃熱甚則嘔也。又云。吐酸。肝木之味也。由火實制金。不能平木。肝木日甚。故爲酸也。則如飲食則喜酸也。或言酸爲寒者。則如酒苦性熱。養於心火。故飲之則令人色赤氣粗。脈洪大而數。語澁譫妄。歌唱悲笑。喜怒如狂。冒昧健忘。煩渴嘔吐。皆熱證也。其吐必酸。宿熱可明矣。

素問至真要大論云。諸吐酸暴注下迫。皆屬於熱。註云。內隔嘔逆噫食不得入。是火也。

論濕熱不利

活人書云。傷寒下利多種。須辨陰陽。勿令差互。大抵傷寒下利多種。須看脈與外證。下利脈大者虛也。脈微弱者爲自止。寒毒入胃。臍下必寒。腹脹滿。大便黃白。或青或黑。或下利清穀。濕毒氣甚。則下利腹痛。大便如膿血。或如爛肉汁也。得之寒毒入胃。四逆理中湯。白通湯。加附子四逆湯等。若濕毒下膿血者。桃花湯。地榆散主之。

守真云。下利膿血者。如世之穀肉果菜。濕氣甚則自然腐爛潰發。化爲水。故食於腹中。感人濕熱邪氣。則自然化爲膿血水。其熱爲赤。熱屬心火故也。其濕爲黃。濕屬脾土故也。燥鬱爲白。屬於肺金故也。濕熱甚於腸胃。怫鬱結也。濕主於痞。以氣逆不能宣通。因而以成腸胃之燥也。濕熱相兼。蓋水火陰陽寒熱。猶權衡也。一高則一下。一興則一衰。豈能寒熱俱盛於腸中而同爲利者乎。若此之繆世傳多矣。則如熱生瘡瘍。素問大奇病論云。腸澼下血。少爲陰氣不足。搏爲陽氣乘之。熱在下焦。故下面血也。素問陰陽別論云。陰結者。便血一升。陰主血故也。再結二升。三結三升。註云。三盛謂之再結。三盛謂之三結。素問至真要論釋云。大熱內結。注泄不止。熱宜寒療。結腹須除。以寒下之。結散利止。則通因通用也。

論霍亂

活人書云。霍亂嘔吐而利。熱多而渴。寒多而不饑。理中丸主之。吐利汗出。發熱惡寒。四肢拘急。手足厥冷。四逆湯主之。吐利已。汗出而厥。四肢拘急不解。脈微欲絕者。通脈四逆湯。豬膽汁湯主之。

錢氏吐瀉問難。廣親七太尉七歲。病吐瀉。是時七月。其證全不食。而昏睡。睡覺而悶亂。吸氣乾嘔。大便或有或無。不渴。衆醫以驚治之。疑睡故也。

錢氏曰。先補脾。後退熱。石膏湯。次日又以水銀硫黃末。生薑水調一字。八月十五已後。吐瀉身冷無陽也。不能乳。乾嘔瀉清。湯水常補脾益黃散主之。不可下。

守真云。吐下霍亂。三焦爲水穀傳化道路。熱甚則傳化失常。而吐瀉霍亂。火性燥動故也。或云。熱無吐瀉。

只是寒此說誤也

素問至真要大論云。諸病喘嘔吐酸。暴注下迫。轉筋。小便渾濁。腹脹大如鼓。有聲如鼓。癰疽瘡疹。瘤氣結核。吐下霍亂。皆屬於火。

論好用寒藥

活人書云。傷寒論家方論不一。獨伊尹仲景之書。猶六經也。其餘諸子百家。時有一得之要。不可爲法。況有好涼藥者。附子硫黃笑而不喜用。雖隆冬使人服三黃丸之類。又有好熱藥者。如大黃芒硝則畏而不敢用。雖盛夏勸人灸病服金液之類。非不知罪福。蓋緣偏見所趨然也。又云。近時用小柴胡湯。不問陰陽表裏。凡傷寒之家。皆令服此藥。蓋不可輕用。雖不若大柴胡湯小承氣之緊要之藥。病不相當。其爲害也。同往往服小柴胡湯而成陰證者甚多矣。又云。陰毒傷寒。心神煩躁。頭痛。四肢逆冷。返陰丹主之。此方甚驗。喘促嘔逆者。入口便住。若加小腸不通。反陰囊縮入小腹。絞痛欲死。臍下二寸灸。仍與返陰丹。常歸四逆。加吳茱萸生薑湯。慎勿與尋常利小便之藥。尋常利小便之藥者。多是冷滯藥。此陰毒氣在小腹所致也。

守眞云。大凡治病必先明此寒暑燥濕風火六氣。最爲要也。故曰。其治病之法。以寒治熱。以熱治寒。以清治溫。以濕治燥。乃正治之法也。又云。逆治。所謂藥氣逆病之氣也。其病輕微則當如此治。其病重當從反治之法。其反治者。亦名從治。所謂從順於病之氣也。是故經曰。以熱治熱。以寒治寒。然以熱治熱。非謂病

氣熱甚。更以熱性之藥治之。本是寒性之藥。反熱佐而服之。所謂病氣熱甚。藥氣反寒。病熱極甚。而拒其藥寒。寒攻不入。寒熱交爭。則其病轉加也。故用寒藥反熱佐而服之。令藥氣與病不相違忤。其藥性寒。熱服下咽之後。熱體既消。寒性乃發。由是病氣隨愈。其餘皆倣此。然正治之法。猶君刑臣過。逆其臣性而刑之矣。故熱病不甚治之以寒。逆其病氣而病自除矣。反治之法。猶臣諫君非。順其君性而以說之。其始則從。其終則逆。可以諫君去其邪而歸於正也。


素問至真要大論云。寒者熱之。熱者寒之。從者逆之。順者從之。王冰註云。病微猶救人火。得龍而熖。得木而燔。可以水滅之。故逆其性氣而抔之。病之氣微。而攻之以寒。病濕猶救龍火。得濕而熖。遇水而燔。不知性以水折之。以濕攻之。適足以光焰詣天。物窮方止矣。識其性者。反常之理。以人火逐之。則焰灼自消。炎光撲滅。然逆之謂以寒攻熱。以熱攻寒。從之謂熱難入。從其性用。不必皆同。是以下。又曰。逆者正治。從者反治。從少從多。觀其事也。此之謂乎。

論小兒瘡疹

活人書云。小兒瘡疹。與傷寒相類。頭痛身熱足冷。脈數。疑似之間。只與升麻解肌兼治。瘡子已發未發。皆可服。但不可下。瘡疹發熱在表。尤不可轉瀉。世人不學。乃云。初覺以藥利之。宜其毒也。誤矣。又云。疹豆已出。不可踈。轉出得已定。或膿血大甚。却用踈利。亦非也。大抵瘡疹首尾不可下。小兒身熱耳尻冷。咳嗽而用利藥。卽毒氣入內殺人。

錢氏曰。瘡疹始出之時。五臟證見。惟腎無候。但見平證耳。飀冷耳涼是也。論瘡疹。飀耳俱屬腎。其居北方。主冷也。若瘡黑陷耳。飀反熱者。爲逆是也。若用牛李膏百祥丸各三服不愈者死。病此瘡疹。當乳母慎口。不可令饑。受風冷。必歸於腎。變黑難治也。有大熱利小便。有小熱宜解毒。若黑紫乾陷者。百祥丸下之。不黑者慎勿下。更時月輕重。故春夏爲順。秋冬爲逆。冬月腎旺。又盛寒。病多歸腎。變黑者。無問何時。十難救一。又曰。瘡疹始出。未有他證。不可下也。但當用平和之藥。類與乳食。不受風冷耳。如瘡疹三日。出不快者。卽微發之。微發不出。卽加藥發之。加藥不出。卽大發之後。不多。若及脈平無證者。卽瘡疹稀少。不可更發也。腎旺盛。脾土不尅水。故脾虛寒戰則難治矣。所以百祥丸者。瀉膀胱之腑。腑若不實。臟自不盛也。何以不瀉腎。曰。腎主虛。不受瀉。故二服不効。反加寒而死矣。

守真云。小兒斑疹未出。誤以熱藥汗。致陽氣轉甚。則重密出不快。多致黑陷而死。恐是斑疹未敢服藥。以誤小兒諸病多矣。亦不知古人留涼瀉之藥。通治驚風積熱。設是斑疹。使熱少退而稀少。出快得痊。除愈也。若用涼膈散爲妙耳。閻孝忠集。小兒論。未達錢氏本意。不明造化之理。及妄言黑陷爲寒。及云斑疹終始不可服涼瀉之藥。後人因之。反致熱甚黑陷而死者。閻公豈不詳錢氏本方。治斑瘡黑陷者。牛李膏百祥丸。寒藥利之。而多獲痊。可不救必死。爲熱豈不明哉。夫斑瘡黑陷者。無不腹滿喘急。而小便赤而不通。豈非熱極者也。豈能反爲寒邪。素問云。諸痛痒瘡瘍。皆屬於火。



傷寒心要

編 洪 鑑

本館據古今醫統正
脈全書本排印初編
各叢書僅有此本

傷寒心要

傷寒心要論

元 都梁錫 洪編

夫傷寒者。前三日在表。法當汗。可用雙解散。連進數服必愈。若不解者。病已傳變。後三日在裏。法當下。殊不知下之太早。則表乘虛入裏。遂成結胸。虛痞。懊憹。斑疹。發黃之證。輕者必危。危者必死。但當以平和之藥。宣散其表。和解其裏。病勢或有汗而未愈。或無汗而愈。當用二小柴胡涼膈天水三藥合而服之。

病若半在表。半在裏。法亦當和解。三小柴胡涼膈主之。

若裏熱微者。則當微下。四大柴胡合解毒湯主之。熱勢未退。又以大柴胡合三一承氣下之。兩除表裏之熱。病至七八日。裏證已甚。表熱漸微。脈雖浮數。則以三一承氣合解毒下之。其病胸膈滿悶。或喘或嘔。陽脈緊甚者。七可用瓜蒂散涌之。

汗吐下三法之後。別無異證者。涼膈散調之。

病熱已去。微熱者。以益元散服之。無令再病。此傷寒治法之大要也。

或傷風自汗。脈浮緩者。十雙解去麻黃以汗之。

其病半表半裏。十一白虎湯和解之。

病在裏脈沉細者無問風寒暑濕或表裏證俱不見或內外諸邪所傷有汗無汗心腹痛滿譫語煩躁畜熱內盛但是脈沉者並用十二承氣合解毒下之

或中暑自汗直格云夏至前爲濕夏至後爲暑是以至後不用白虎宜乎局方云解以白虎湯立秋後不用白虎子和云若有白虎證亦不用乎却用詳審之耳

白虎解後以五苓合天水調之多進數服無妨或腹脹滿脈沉者亦當承氣合解毒微下之

或發汗之後熱不解脈尙浮者十六白虎加蒼朮再解之

或裏熱內盛陽厥極深皆因失下而成此證以致身冷脈微昏憒將死切不得以寒藥下之誤下卽死又一輩庸醫妄言是陰厥便欲易換用玄武四逆溫熱之劑投之下咽立死殊不知此證乃陰耗陽竭陰氣極弱謂之耗陽厥極深謂之竭畜熱怫鬱將欲絕者當此之證寒劑熱劑俱不可投但進涼膈解毒十七以養陰退陽宜散畜熱脈氣漸生得大汗而愈有無汗氣和而愈者

未愈却解毒合承氣十八下之次以解毒涼膈天水合而爲一十九調和陰陽洗滌臟腑則其他別證自不生矣

有大下之後熱不退再三下之熱愈盛若下之不愈脈微氣虛力弱不加以法則無可生之理若輟而不下則邪熱極盛陰氣極衰脈息斷絕必不可救似此之證是下之亦死不下亦死醫者到此活人殺人一彈指間其不至手足失措者幾希矣直格云傷寒汗後汗出不解或反不汗脈尙浮白虎加蒼朮湯再解神汗止身涼此通仙之法也如此則汗下之後熱不退不問有汗無汗均宜白虎加蒼朮解之又加入參亦妙仍服涼膈解毒調之

經云。三下而熱不退者。卽死。後人有四五次下。以十數行而生者。此乃誤中耳。活者未一二。死者千百。後學切不可以爲法。但當依前用解毒合涼膈調之。使陽熱徐退。陰脈漸生。庶不失人命。

若傷飲不散。成結胸之證。臨時擇用二十大小陷胸湯丸累下之。脈浮者不可下。是表證未出。小柴胡合小陷胸湯二十一投之。脈雖浮而熱大極者。二十二承氣徐徐疎利之。

或有留飲過度。濕熱內生。自利不止。其熱未退。二十三解毒湯治之。

陽毒生斑。二十四涼膈加當歸。

怫鬱熱盛。在表燥而無汗。濕熱在裏。不能發於外。相搏遂成發黃。二十五茵陳湯調五苓散。甚者二十六

茵陳合承氣下之。

煩心不得臥。二十七梔子湯。

悞下太早。遂成結胸。虛痞。二十八涼膈加枳殼桔梗。剛柔二症。譫語發狂。踰垣赴井。皆陽熱極盛者。二十

九承氣合解毒下之。

汗下之後。煩渴飲水。則三十涼膈減桂五苓甘露益元選而用之。小便不通。五苓泄之。大便閉結。承氣下

之。更有外證加減通聖散。方內隨證用藥。

婦人證治皆然。惟孕婦三四月并七八月不用硝。其餘月分用之無妨。

小兒減劑服之。

此中有古人治傷寒不傳之妙。後之學者。其慎寶之。

〔第一〕雙解散

防風通聖散

防風去蘆川芎

當歸焙

赤芍藥

大黃

麻黃

連翹

芒硝半兩

石膏

黃芩去腐

桔梗一兩

甘草二兩

滑石三兩

荆芥

白朮

梔子二錢半

右爲散。每服三錢。水一盞。薑三片。煎六分。溫服。大黃芒硝麻黃三味對證。旋入自利。去大黃芒硝。自汗

去麻黃。

天水散 益元 六一

滑石六兩 甘草一兩

右爲末。每服三錢。溫蜜水調。暑月冷水亦可和解。傷寒傷風發汗。葱白五寸。豆豉五十粒。煎一盞。調四五錢。并三服。解利爲度。加薄荷尤妙。

通聖合益元

右七兩和勻。每服三錢。水一盞半。葱白五寸。豆豉五十粒。薑三片。煎一盞。溫服。

〔第二〕小柴胡。涼膈。天水合服。

小柴胡湯

北柴胡^三兩黃芩

人參

半夏

生薑

甘草

大棗一兩

右爲散。每服五錢。

涼膈散

連翹二兩梔子

大黃

薄荷

黃芩一兩甘草

芒硝

右爲散。每服三錢。水一盞。煎七分。入蜜少許。竹葉五片。

〔第三〕涼膈合小柴胡。

〔第四〕大柴胡合黃連解毒湯。

大柴胡湯

柴胡去苗大黃半兩黃芩

白芍藥分半夏泡七次二錢

枳實生三錢

右爲散。分三服。水一盞半。生薑三片。大棗一枚。煎半盞。溫服。

黃連解毒湯

黃連

黃藥

黃芩

梔子等分

右爲散。每服半兩。水一盞。煎五分。溫服。

〔第五〕大柴胡合三一承氣湯。

三一承氣湯

大黃 芒硝 厚朴 枳實各半兩 甘草一兩

右剉。每服二錢半。水一大盞。薑三片。煎六分。入硝。再煎一二沸。

〔第六〕承氣合解毒湯。

〔第七〕瓜蒂散。

瓜蒂 赤小豆等分

右爲末。豆豉湯調下一錢。未吐再服。

〔第八〕涼膈散。

〔第九〕益元散。

風

〔第十〕雙解散。

〔第十一〕白虎湯。

知母兩半 甘草一兩 粳米一合 石膏四兩

右剉。每服五錢。水一棧。煎六分。溫服。

〔第十二〕承氣合解毒湯。

暑

〔第十三〕白虎湯。

〔第十四〕五苓散合天水散。

五苓散

豬苓 茯苓三錢 茯苓去皮 官桂 一分 澤瀉 一兩 白朮 一錢 活人書三分 宜明論半錢

右細末

〔第十五〕承氣合解毒湯。

〔第十六〕白虎湯加蒼朮。

〔第十七〕涼膈合解毒湯。

〔第十八〕解毒合承氣湯。

〔第十九〕解毒涼膈天水合。

結胸

〔第二十〕大小陷胸湯丸。

大陷胸湯

大黃 芒硝三錢 甘遂三字

右剉四錢。水一饒煎。大黃六分。內消再煎。一二沸內甘遂。溫服。未利再與。

小陷胸湯

半夏四錢生薑切 黃連二錢 栝樓實牛髓全剉

右剉水三盞煎栝樓至盡半內藥煎至一盞分作兩服。

大陷胸丸

大黃半兩 葶藶二錢微炒 芒硝一錢

杏仁十二枚去皮尖 秦灰炒變色

右大黃爲末研葶藶杏仁爲膏圓如彈子大甘之末三字蜜半匙水一錢煎半錢溫服一丸一宿乃下。未利再與。

〔第二十一〕小柴胡合小陷胸湯。

〔第二十二〕承氣湯。

大黃錦紋者 芒硝朴硝有芒頭者 厚朴去殼枳實各半

右剉如麻豆大分一半用水一碗半生薑三片煎至六分納硝煎一二沸絞去滓熱服。

〔第二十三〕解毒湯。

發斑

〔第二十四〕涼膈散加當歸。

發黃

〔第二十五〕茵陳湯調五苓散。

茵陳湯

茵陳一兩 大黃半兩 梔子十箇

右剉。水二盞煎一盞。溫服。利爲度。

〔第二十六〕茵陳合承氣。

煩心不睡

〔第二十七〕梔子豉湯。

梔子七箇 剉 豆豉二合

右水二盞。先煮梔子。盡半。內豉。煮半盞。

〔第二十八〕五苓空腸煎。涼膈加桔梗枳殼。

剛柔二症

〔第二十九〕承氣合解毒湯。

汗後煩渴

〔第三十〕涼膈減桂 五苓 甘露 益口

甘露飲

茯苓

澤瀉

甘草

石膏

寒水石二兩

白朮

桂枝

豬苓半兩

滑石四兩

右爲末。每服三錢。湯調。或新汲水。薑湯尤妙。

右共十八方。如無大承氣。係第五三一承氣代之亦妙。通三十九件藥味。調理傷寒。曲盡其妙。百發百中。後之學者。詳辨脈證。審而用之。起沉痾於指掌。策奇功以活人。方知其妙也。

新增病後四方

小半夏湯。治汗下後嘔吐不已。

半夏五兩

赤茯苓三兩

右剉。每服半兩。水二盞。煎至一盞。投薑汁更煎。一二沸。

五味子湯。治汗下後氣閉咳嗽。

五味子兩半

麥門冬

人參

杏仁

陳皮

生薑一錢

棗子二枚

右剉。每服二錢。水二觔。煎一觔。作二服。

大橘皮湯。治汗後胃虛。

陳皮

甘草一兩

人參二兩

右剉每五錢。水盞半。薑二片。煎至一盞。溫服。
赤茯苓湯。治胸膈滿悶頭痛已得汗者。

陳皮 甘草 人參 半夏 川芎 白朮等分

右剉。每服五錢。水盞半。薑三片。煎一盞。溫服。

傷寒心要餘論

五臟六腑。應五運六氣。凡病微則當其本化。甚則兼其鬼賊之化。亢則害。承乃制。微則是其本經本臟之本化。造化之化也。病甚則如金衰不能制木。木則生火。木火者皆陽也。故風火多兼化。則風熱相搏賊其金也。

臟腑之氣。應乎三陰三陽。實則行乎本化之氣。瀉之。衰則行其勝已之氣。瀉之。是爲殺其鬼賊也。

如諸陽畜熱。以涼膈合解毒服之。解散極熱。

如瀉火熱。解毒調胃承氣是也。

如吐法。用二仙散。

如調理傷寒。白虎涼膈合服解之。

傷寒三日以裏。連進雙解。如無汗。必是傳變。待三四日之間。以小柴胡解表裏之熱。仍間服白虎涼膈。總熱七八日之間。欲下而表證猶在。以大承氣湯。大柴胡湯。雙行并煎。攻裏發表。最爲穩當。若是溫熱內甚。

自利者。止涼膈。卻進解毒。間白虎服之。或惡心乾嘔吐者。白虎大作一劑。調解毒末五錢服之。卽止。大小便不通。併有腹痛不能忍者。以無灰酒煎朴硝三兩。熱服卽愈。亦按從治之法也。熱中伏寒下之已。或大承氣湯加木香瀉之尤妙。

傷寒久下。始病時。又誤服麻黃熱劑。大甚必致熱極。或有陽厥極深。身冷脈微。陽極似陰之證。庸醫以爲陰證是也。須當急救其陰。以白虎涼膈日進三服。脈氣漸生。身體漸溫。然後以大承氣下之。夫大承氣救急之妙劑。如咽膈吐逆不利。常令熱服。開其鬱結。利而卽愈也。

如傷寒汗下之後。自汗虛熱不止。於白虎湯加人參蒼朮一服如神。汗止身涼。此法至妙。不容詳盡。如赤白痢。先服黃連阿膠丸。次服解毒湯。

傷寒瘡瘍。破傷風。與傷寒治法一同。但以雙解涼膈白虎承氣臨時斟酌用之。雙解涼膈白虎瀉心。此理傷寒之妙劑。


孕婦臨月可服。益元涼胎。產後仍服。如血不盡。則以涼膈與四物合煎調理。經血甚者。大承氣合四物。乃瀉中有補也。

涼膈同四物。名玉燭散。婦人產後之妙劑。

涼膈四物合大承氣湯。名三和湯。

大承氣合四物治婦人一切血積血聚等疾。加紅花尤妙。初生小兒。五七日有熱證。不得已。只以益元散。

時時灌之。如小兒夜啼。用涼膈調之。肚餓臨睡服。
凡瘡瘍癰瘻。涼膈加當歸治之。



傷寒證脈藥截江網

陶華述

傷寒證脈類編江網

本館據古今醫統正
脈全書本排印初編
各叢書僅有此本

傷寒證脈藥截江網

明 餘杭節菴陶 華述

傷寒

傷寒之病。非比雜科。乃大方脈之首務也。其間脈理精深。良震無常。死生反掌。甚所難明。苟或有稱治傷寒者。未免羊質虎皮。然則名譽虛隆。而實德則病矣。余早年盲學。昏昏如蠅觸牖。後得漢長沙張仲景先師治法所得石函遺著。名曰遺芳嘉祕。玩而誦之。以開茅塞。手足舞蹈不自知也。數試數驗。豈不珍重哉。第恐吾老悖。亦猶前之昏學。臨病無措。故將遺旨。應手得心。訣法。纂以成集。名曰傷寒證脈藥截江網。存與朝夕備覽。以看省己之愚。原夫傷寒之脈。浮大動數滑爲陽。沉澁弱弦微爲陰。其弦緊浮滑沉澁六者。爲殘賊之脈。故諸脈作病。春弦。夏洪。秋毛。冬石。土緩。爲四季之正脈。浮。沉。遲。數。爲客主。左爲人迎。右爲氣口。呼出心肺爲陽。吸入腎肝爲陰。一呼一吸爲一息。寸口爲陽。尺澤爲陰。中爲關界。陽主氣。陰主血。血爲榮。氣爲衛。寒則傷榮。風則傷衛。理自然也。所謂傷寒之病。從淺入深。先以皮膚肌肉。次入筋骨腸胃。專以浮。中。沉。遲。數。辨其陰陽寒熱。及表裏虛實。而斷之矣。諸浮爲在表。輕手于皮膚之上。便得之。曰浮。略重指于皮膚之下。肌肉之上。陰陽各半。得之。曰中。證屬半表半裏。諸沉爲在裏。重手于肌肉之下。筋骨之間。方得之。曰沉。屬陰。諸遲爲在臟。屬寒。諸數爲在腑。屬熱。陰陽寒熱虛實。用在有力無力中分。有力者爲陽。爲熱。爲實。無力者爲陰。爲寒。爲虛。雜病以弦爲陽。傷寒以弦爲陰。雜病以緩爲弱。傷寒以緩爲和。傷寒以大

爲病進。以緩爲邪退。緩爲胃脈。有胃氣曰生。無胃氣曰死。傷寒病中有神脈。如脈中有力。卽爲有神。神者氣血之先也。兩手無脈曰雙伏。一手無脈曰單伏。必有正汗也。寸口陽脈中。或見沉細者。但無力者。爲陽中伏陰。尺部脈陰中。或見沉數者。爲陰中伏陽。寸口數大有力。爲重陽。尺部微而無力。爲重陰。寸口細微如絲。爲脫陽。尺部細微無力。爲脫陰。寸脈浮而有力。主寒邪表實。宜汗。浮而無力。主風邪表虛。宜實。尺脈沉而有力。主陽邪在裏。爲實。宜下。無力。主陰邪在裏。爲虛。宜溫。寸脈弱而無力。切忌發吐。尺脈弱而無力。切忌汗下。初按來疾去遲。名曰內虛外實。去疾來遲。名曰內實外虛。尺寸俱同。名曰緩。緩者和而生也。汗下後。脈靜者生。躁亂身熱者死。乃邪氣勝也。溫之後。脈來歇止者。正氣脫而不復生也。純弦之脈。名曰負。負者死。按之解索。名曰陰陽離。離者死。陰病見陽脈者生。陽病見陰脈者死。

傷寒標本論治

病之有標本。猶草之有根苗。拔茅須連其茹。治病必求其本。標本不明。處方何據。所謂瞑目夜行。無途路而可見矣。原夫六氣爲本。三陰三陽經爲標。病氣爲本。臟腑經絡受病爲標。先受病爲本。次受病爲標。且如尺寸俱浮者。太陽受病也。其經標本。膀胱小腸也。膀胱寒水爲本。其脈循脊上連風府。故頭疼脊強。小腸爲標。主發熱。其正冬月時。在本者麻黃湯。在標者桂枝湯。餘月改用冲和湯也。尺寸俱長者。陽明受病也。其經標本。大腸與胃也。大腸爲標。燥金爲本。大腸與肺爲表裏。但發熱解肌湯。本脈絡鼻循目。故目痛鼻乾不眠。虛則汗解。實則大柴胡承氣選用。尺寸俱弦者。少陽受病也。其經標本。三焦與膽也。三焦相火

本也。遊行乎一身。故微熱。足臈標也。其脈循脇絡耳。故耳聾。脇痛。寒熱。嘔而口苦。緣臈無出入之路。故從中治。證用小柴胡和解散而愈。其經有三禁。汗下吐是也。尺寸俱沉者。太陰受病也。其經標本。肺與脾也。肺標脈循咽。脾本濕土。故腹滿咽乾。當得本治。宜泄。大柴胡承氣也。尺寸俱微沉者。少陰受病也。其經標本。心與腎。君火爲本。心苗舌。故舌燥。標腎脈循肺。主口乾。故口乾舌燥。故在標者。因身冷治。主姜附也。在本者。宜下。三乙承氣。看微甚而用之。尺寸俱微緩厥陰受病也。其經標本。肝與心包絡也。風木爲本。下循陰器。故囊縮。標心包絡。繫舌。故舌卷。大抵溫之。四逆輩。其四經并前三經中。若有陽分傳來者。下之。庶不誤也。

論傷寒正治逆治反攻寒熱辨

寒熱真假不可不知。正治逆治豈可不辨。假如熱病服寒藥。熱不退。後用熱藥。而熱方退。假如寒病服熱藥。寒而不退。後用寒藥。而寒方退者。此爲從治也。從治者反攻也。治熱病以寒藥而愈。治寒病以熱藥而愈者。逆治也。逆治者正治也。且反攻之法。人亦難曉者多。如寒病服寒藥而愈者。此陽極變陰。熱極反得水化也。熱病服熱藥而愈者。此陰極變陽。寒極反得火化也。蓋物極則反也。

論傷寒用藥法則

標本逆從之既明。五劑之藥須用識。且如表汗用麻黃。無葱白不發。吐痰用瓜蒂。無豆豉不湧。去實熱用大黃。無枳實不通。溫經用附子。無乾姜不熱。甚則以泥清水加葱白煎之。竹瀝無姜汁。不能行經絡。蜜導

無皂角不能通秘結。非半夏姜汁不能止嘔吐。非人參竹葉不能止虛煩。非小柴胡不能和解表裏。非五苓散不能通利小便。非天花粉乾葛不能消渴解肌。非人參麥門冬五味不能生脈補元。非犀角地黃不能止上焦之吐衄。非桃仁承氣不能破下焦之瘀血。非黃芪桂枝不能實表間虛汗。非茯苓白朮不能去濕助脾。非茵陳不能除黃疸。非承氣不能制定發狂。非枳桔不能除痞滿。非陷胸不能開結胸。非羌活沖和不能治四時之感冒。身疼。非人參敗毒不能治春瘟。非四逆不能救陰厥。非人參白虎不能化斑。非理中烏梅不能治蚘厥。非桂枝麻黃不能除冬月之惡寒。熱隨汗解。非姜附湯不能止陰寒之泄利。非大柴胡不能去實熱之妄言。陰陽咳嗽。上氣喘急。用加減小青龍分表裏而可汗下。此傷寒用藥之大法也。

傷寒統論受病之由

夫傷寒者。冬時天氣嚴寒。水冰地凍。而成殺厲之氣。正乃腎與膀胱。坎水用事。體虛觸冒之人。中而卽病。曰傷寒。不卽病者。乃寒毒藏于肌膚。此因腎水涸竭。春木無以發生。熱不能發泄。藏鬱于內。遇感而發。至春變爲溫病。至夏變爲熱病。熱病重於溫病也。雖曰傷寒。實爲熱病。非時行之氣。春應煖而反寒。夏應熱而反涼。秋應涼而反熱。冬應寒而反溫。此非其時而有其氣。是一歲之中。長幼病皆相似者也。是時行不正之氣。非暴厲之氣。暴厲者疫病也。疫病者乃春分至秋分前。天有暴寒。皆爲時行之寒疫也。又有四時之正氣者。春氣溫和。夏氣暑熱。秋氣清涼。冬氣凜冽。此四時之正氣也。然正氣亦能爲病。春傷于風。夏必殮泄。夏傷于暑。秋必癘痢。秋傷于濕。冬必咳嗽。冬傷于寒。春必溫病。總曰傷寒病。自外而入。或入于陽。或

入于陰。非但始于太陽。終于厥陰。或有太陽傷者。或有傳至一二經而亡者。或有始終只在一經者。或有赴經而傳者。或有入太陽不作鬱熱。便入少陰。而成陰證者。或有直中陰經而成寒證者。緣經無明文。故多妄治。若三陽傳至三陰之陰證。外雖有厥冷。內有熱邪耳。若不發熱。四肢便厥惡寒者。此是直中陰經之陰證也。蓋先起三陽氣分。傳入三陰血分。則熱深厥亦深矣。此亢則害。承迺制者歟。熱極反兼寒化也。先熱後厥者。傳經陰證也。故宜四逆散。大承氣。看微甚而下之。如初病無熱便厥者。此直中陰經之寒證也。宜四逆湯溫之。

傷寒無陰證辨

傷寒無陰證。人傷于寒。則爲病熱。熱病乃汗病也。造化汗液皆陽氣也。冬時腎水用事。爲傷寒者。其風傷于榮衛。使人毫毛畢直。皮膚閉而爲熱。初入太陽。膀胱受證。頭疼惡寒。發熱。腰脊強直。按至皮膚之上。下手便得。脈來浮緊有力。無汗爲傷寒表證。寒則傷榮血。冬用麻黃湯開發腠理。表汗除邪。脈來浮緩無力。有汗怕風爲傷風。風則傷衛氣。冬用桂枝湯。充塞腠理。止汗散邪。其餘月時雖無惡寒爲重也。治三時感寒。無汗。以羌活沖和。去地黃加紫蘇藿香以發散之。有汗。用加減羌活湯。如用桔梗湯止汗退邪。必加涼藥于中。免班出黃生之患。此謂無伐天和也。若將冬時。正傷寒之藥。通治非時暴感寒熱。定爲害矣。

論傷寒難拘日數辨

假如一日至十三日。若有一毫頭痛惡寒者。每日如此。不論日數多少。尙有表證未解。還用微汗。不可攻。

裏。若攻下之。則爲結胸等證也。

一二日惡寒皆除。便覺胸中滿悶疼痛。大便閉。渴而不惡寒。反怕熱。熱入裏也。大柴胡承氣下之。切不可拘于日數。并始太陽終厥陰之論也。

二三日邪傳陽明胃。身熱目痛。鼻乾不眠。按至皮膚之下。肌肉之間。脈來微洪而長者。屬半表半裏。渴而無汗。葛根湯。渴而有汗。人參白虎湯。微微惡寒者。桂枝湯。若無頭疼惡寒。而反怕熱。便閉。燥渴。狂言。譫語。揭去衣被。揚手擲足者。此爲熱邪傳入陽明之本。脈來沉數有力。正宜承氣湯下之。泄去胃中實熱。燥屎而愈也。

三四日邪傳少陽膽。胸脇痛而耳聾。寒熱。嘔而口苦。按至半陰半陽。及脈來弦數者。是半表半裏也。緣膽無出入之路。用小柴胡。其經有三禁。汗下吐也。蓋陽明與少陽三經不從乎中治也。中者半表半裏。兩陽交中。名曰少陽也。

四五日邪傳太陰脾。腹滿咽乾。口燥而渴。按至筋骨之間。脈來沉而有力者。桂枝大黃湯。若不渴自利。身無熱。脈來沉緩無力者。四逆湯溫之也。

五六日邪傳少陰腎。口乾口燥。重指按至筋骨之間。脈來沉而有力者。正用大柴胡承氣下之。若發渴自利。清水不多。腹脹者。亦當下之。俱是陽邪傳入陰經之陰證也。若有一時初起。不入太陽。竟入太陰。無頭疼身熱。便見四肢厥冷怕寒。或腹痛自利。小便清白。脈沉無力。或脈全無者。此是直中陰經之陰證也。非

是三陽傳來。急用附子理中湯溫之。脈沉有二。陰陽寒熱虛實。用在有力無力中分。有力爲熱。無力爲寒。又有少陰太陽二證相併。脈沉無力。當無熱。今反有熱。如不頭痛者。陰證反陽也。麻黃細辛湯。身發熱。脈當浮大。今反沉細。若有頭痛者。陽證反陰也。四逆湯主之。

六七日邪傳厥陰。肝煩渴。囊縮。舌卷耳聾。身不熱。大便閉。按至筋骨之間。脈實絃而有力。正用承氣下之。此邪從三陽傳入三陰。外有厥冷。內有邪熱耳。如脈微而無力。腹痛自利。不渴。四肢厥冷。怕寒者。真陰寒證也。附子理中湯溫之。口中出沫流涎者。亦寒也。茱萸理中湯主之。

傷寒陽厥陰厥辨

陽厥。脈沉而有力。腹痛後重。大便稠粘。小便赤澀。或大便不通。必是先熱後發厥也。其四肢雖冷。上不過肘。下不過膝。此熱深陽厥也。承氣湯下之。陰厥。脈沉而無力。口不渴。四肢痛甚。及大便泄利。小便清白。而身怕寒。面如刀刮。四肢厥冷。上過乎肘。下過乎膝。此陰厥也。四逆湯治之。兩陽交盡。名曰厥陰也。大抵三陰無傳經。胃實熱。可下也。又有傷寒兩感者。病爲巨陽老陰也。

看傷寒識證內外須知

大抵傷寒先須識證。察得陰陽表裏。虛實寒熱。親切復審。汗吐下溫和解之法。治之庶無差誤。先看兩目。次看口舌。後以手按其心胸。至小腹。有無痛滿用藥。如目皆黃。必爲欲愈之病也。眼胞忽陷。目睛直視。必難治也。開目欲見人。屬陽。閉目不欲見人。屬陰。目睛不明。神水已竭。不能照物者。亦難治也。

次看口舌。上有白胎者爲熱。見黃胎者爲熱甚。見黑胎及生芒刺者必死。

後按其心胸。有痛而滿悶者。亦未經下之。爲表邪尙在少陽部分。只用小柴胡湯。加枳殼桔梗爲的。如按其心下滿痛甚者。已經下矣。爲結胸。正用陷胸湯。看微甚而用之。陷胸宜從緩治。結胸證。煩躁悉具者死也。

如小腹覺有硬痛。當按其痛。更問其小便通利若何。如通。則知畜血下焦。宜破瘀血。用桃仁承氣湯。盡黑物爲好。如小便不通。則知津液留結。宜五苓散。如木通山梔治之。

但覺發熱惡寒。頭痛。腰脊強。脈浮。不拘日數。即是太陽表證。浮緊有力。無汗。爲傷寒。宜發汗。浮緩無力。有汗。爲傷風。宜實表。

但見肢痛。咽乾而渴。身無熱。手足溫。脈沉有力。明是熱邪傳來太陰裏證。宜當下之。如肢痛。自利不渴。惡寒。手足厥冷。脈沉無力。此是太陰自受陰也。宜當溫之。

但見口燥。咽乾而渴。妄語。怕熱。大便閉。或微利清水而大渴。脈沉有力。明是熱邪傳來少陰裏證。不拘日數。卽宜下之。如肢痛。泄利。嘔吐。怕寒。手足厥冷。不渴。脈沉無力。此是少陰直中。自受內寒。陰證。急用溫之。但見舌卷囊縮而渴。身不熱。外雖四肢微冷。內有實熱。脈來沉緩有力。或大便閉實。明是熱邪傳來厥陰之證。卽宜下之。如肢痛。泄利。嘔吐。不渴。怕寒。四肢厥冷。小便清利。脈微無力。此是厥陰自中其寒證也。急宜溫之。俱照前六經中用藥。其一切躁渴。大便閉。發狂。譫語。腹滿。微厥。斑血證。脈來有力者。俱是從三陽

邪熱傳入三陰裏證。宜當下之。輕重用藥無疑。如寒當急溫之。不可緩也。有傷寒一日傳二經爲兩感。三日傳盡必死。再傳止于六日。夫兩感發于表者。麻黃葛根湯也。攻裏者。調胃承氣湯也。如未盡善。須問病者有無痛處。大小便通利。若胸痛者爲結胸。不痛者爲痞氣。乃因下早而成也。未經下者。非結胸也。乃表邪傳至胸中。症雖滿悶。尙有表邪未及乎腑。正屬少陽部分。用小柴胡湯加枳殼以治之。如未效。以本方加小陷胸湯。服之而愈。痛甚者。大陷胸湯下之。

論傷寒傳足不傳手之誤

傷寒傳足不傳手。此謬言也。人之一身無非血氣。且風行水動。氣行血流。晝夜循還而運行不息。豈有不傳手經哉。何所據也。冬月腎水用事。天氣嚴寒。則足少陰太陰正司受傷。三經最多。其次是少陽厥陰。肝膽繼冬而施春令。蓋風木起于大寒之次。卽正當十二月中。至春分。方行溫令。故風寒傷之。足陽明太陰脾胃中土。中土無定位。無成名。寄旺于四時。寒熱之氣。皆能傳也。其邪亦歸于胃。其手之經主于足。故不傷也。若言傷足不傷手。正理也。若言傳足不傳手。非理也。

論傷寒六經變正法

夫六經傳變所由。必須緊記。誦不釋手可也。且如鄭聲者。手足鄭重。冷而爲虛也。譫語有虛有實。虛則失血亡陽。實則內熱便閉。脾約者。大便硬而小便利。水穀不化。臟寒也。久利不止曰腸癰。傷寒十三日不好。曰過經。吐長虵曰虵厥。陰厥發燥曰陰燥。手足冷者。爲之厥。指頭微寒。情之縱。汗吐下溫不好曰壞證。又

若何爲逆。逆而有四。或變爲溫瘧。或變爲風濕。或變爲溫毒。或變爲瘟疫。此四者是也。發汗出不止曰漏風。亦爲亡陽。大下損血爲亡陽。陽證汗出不止曰亡陽。大取汗發證者曰亡陽。大抵皆無汗。其有汗者曰亡陽。三月至夏方發爲晚發。冬感寒而春發者曰溫病。非時暴寒伏于少陰之經。咽痛下利。名曰腎傷寒。發汗後身灼熱者曰風溫。名中暍。感四時不正之氣。老幼相似者爲疫癘。病瘥後必發者曰勞復。病瘥後多食而發者曰食復。病瘥後發熱者曰遺熱。吐利交作曰霍亂。鼻中出血曰衄。逆咳者曰嗽。乾嘔者曰噦。大便挾寒下利曰腸垢。大便堅硬曰鞭。心振寒而動曰悸。渴飲水而吐曰水逆。心中惱亂不安而悶者曰懨懨。皮膚不知痒痛者曰不仁。振握而動曰肉瞤。筋惕。臍下有動氣曰奔豚。上有吐者曰湧之。下利者曰洩之。手足攣搐者曰瘰癧。四肢風病曰未疾。厥而下利。當不食。及能食者曰除中。三陰無合病。三陽俱病者曰合病。二陽先病。後一陽自病曰併病。溲泄之所曰溲。曰理。婦人之中二曰理也。

論傷寒見證識病法

傷寒之病。從表入裏。裏必達外。見證之由所屬。必相審。治庶無誤也。且如頭病項強者。太陽證也。頭搖者裏病也。頭汗者裏有瘀血。必發黃也。面戴陽者。下虛也。面慘不光。傷寒也。面光不慘。傷風也。面上乍黑乍白。唇口生瘡。狐惑也。面如錦紋者。陽毒也。口難言。血少也。舌上有白胎。黃胎。內熱也。或黑者。熱極也。鼻燥。漱水不下。或目瞑。溺血也。目睛黃。小腸熱也。懷懷者。胃虛也。喜惡如狂。畜血也。肉瞤筋惕。汗下虛也。身如被杖。陰毒也。一身盡痛。多眠。或微腫難轉者。風濕也。身目俱黃。濕熱疸病也。身如蟲行。表虛也。背惡寒。陰

勝寒也。不眠。因汗下多而神虛也。坐而伏者。短氣也。下利清穀。內寒也。咽中生瘡。上實下虛也。舌上生刺。熱盛也。利者熱盛也。又手冒心。因汗多而血虛也。腹滿手足溫者。邪入太陰也。舌卷囊縮。邪入厥陰也。

論傷寒有證見之必死法

夫傷寒死證。一一須明。生死不明。將何措手。非惟有干名節。亦且投藥無用。且赤斑者五死。五生。黑斑者十死。一生。陽證見陰脈者死。發少陽汗。連厥陰血者。厥竭而死。發左右逆氣汗者死。發風濕者死。發陰陽毒過六七日死。太發濕家汗。成瘧熱而瘧者死。發熱發少陽汗。譫語者死。發溫家汗。爲重暈者死。兩感傷寒者死。有汗不爲汗衰。爲陰陽交者死。結胸證。悉具煩躁者死。狂言不食者死。發厥肌冷而發躁。無時得安者。口臟厥而死。結胸舌上生胎。爲臟結者死。咳逆不止者死。舌卷囊縮者死。少陰吐利煩躁。四逆者死。結胸證。煩躁悉具者死。少陽與陽明合病。下利脈長大。名曰負。負者死。目亂無神氣。目無精者死。男子病新瘥。婦人與之交。曰陽易。婦人病新瘥。男子與之交。曰陰易。男子陰腫。小腹痛。婦人裏急。連腰股。眼昏。四肢拘急。爲女勞復者死。厥利本不能食。反能食。爲除中者死。傷寒七八日。大發熱。汗出不止。如貫珠。此本氣衰者死。爪甲青。爲陽衰者死。循衣摸床。喘而不休。衛氣絕者死。柔汗爲冷。汗出發黃者。乃脾絕也。死。唇吻反青。乃肝絕也。死。環口黎黑。脈絕也。死。直視搖頭。心絕也。死。面黑遺尿。腎絕也。死。聲如鼻鼾。肺絕也。死。身體如疆。正氣脫也。死。喘而不休。邪氣勝也。死。水漿不下。胃氣絕也。死。形體不仁。榮衛不行也。死。乍靜乍亂者。死也。

論婦人傷寒與男子不同治法

且夫天地陰陽各有分位。傷寒雜病豈無各科。男婦何可同治也。男子調氣爲主。女子養血爲先。女子血畜則血室不畜。二氣和平。一有凝結。水火相刑。凡氣口緊盛者。卽宜下。人迎緊盛者。卽宜汗。但婦人左關浮緊者不可下。當發汗以救血室。榮衛得和。津液得行。浹然汗出而解。凡婦人經水適斷。晝則明了。暮則譫語。如見鬼狀。此爲熱入血室。無犯胃氣。及上中二焦。言無犯胃氣者。謂不可下也。以小柴胡湯主之。若行陽遲則熱入胃。令津液燥。中焦上焦不榮。成血結胸。須針期門可也。但婦人傷寒發熱惡寒。四肢拘急。口燥舌乾。經脈凝滯。不得往來。以桂枝紅花湯。

若傷寒。口燥咽乾。不思飲食。以黃芩芍藥湯。

若傷寒喘急煩燥。戰而作寒。陰陽俱虛。不可下也。以小柴胡湯。

若傷寒經水適來。邪乘虛而入。晝則明了。暮則譫語。如見鬼狀。此爲熱入血室。無犯上中二焦胃氣者。宜小柴胡湯。

若傷寒瘥後。猶有餘熱不去。謂之遺熱。宜地黃湯主之。

論妊婦傷寒又與前證有易法

黃帝內經曰。有故無殞也。大積大聚不可犯也。損其大半而止。過則殺也。且妊婦傷寒。保胎宜阿膠散。大抵妊婦傷寒。仲景無治法。最宜避忌諸藥。不可以尋常例視之。凡妊婦用安胎飲。散寒邪。以白朮湯。

妊婦增寒壯熱。宜發其汗。以芍藥湯。

妊婦或中時行。洒淅寒熱。作寒振慄而悸。如噦者。宜蘇木湯。

妊婦傷熱。嘿嘿欲眠。不欲食。脇下痛。嘔逆。痰氣及產後病傷風。熱入胞宮。寒熱如瘧。并經水適來適斷。病

後勞復。餘熱不解。以黃龍湯。

妊婦頭目眩疼。壯熱心躁。以旋覆花湯。

妊婦發斑。以梔子大青湯。

產後傷寒與胎前有別法

且產婦始生。氣血俱虛。外失衛護。內無主持。最宜調養。設受風寒。豈能救治。故與胎前不同。且產後十數日不解。頭痛惡寒。時時有熱。心下堅。乾嘔汗出。以陽旦湯。

產婦忘津液。大便多秘。或譫語煩燥。宜服神功丸。

產婦頭疼身熱。兼腹內拘急痛疼。以桂心牡蠣湯。

產婦傷風發熱。面赤而喘。頭痛。以竹葉防風湯。



傷寒一提金

陶華述

本館據古今醫統正
脈全書本排印初編
各叢書僅有此本

傷寒一提金

明 餘杭節菴陶 華述

一提金啓蒙

余謂初學醫者。先熟藥性。次明經絡。再識病名。然後講解脈理。以證其所生病。證脈相同。藥無不應。病家云發熱惡寒。頭項痛。腰脊強。則知病在太陽經也。身熱目痛。鼻乾不得眠。則知病在陽明經也。胸脅痛。耳聾口苦。舌乾。往來寒熱而嘔。則知病在少陽經也。腹滿咽乾。手足自溫。或自利不渴。或腹滿時痛。則知病在太陰經也。引衣踏臥。惡寒。或舌乾口燥。則知病在少陰經也。煩滿囊縮。則知病在厥陰經也。潮熱自汗。譫語發渴。不惡寒。反惡熱。揭去衣被。揚手擲足。或發斑黃。狂亂五六日不大便。則知病在正陽明胃腑病也。設若脈證不明。誤用麻黃。令人汗多亡陽。誤用承氣。令人大便不禁。誤用姜附。令人失血發狂。正爲寒涼耗其胃氣。辛熱損其汗液。燥熱助其邪熱。庸醫殺人。莫此爲甚。傷寒之邪。實無定體。或入陽經氣分。則太陽爲首。其脈必浮。輕手便得。或入陰經血分。則少陰爲先。其脈必沉。重手方得。浮而有力無力。是知表之虛實。沉而有力無力。是知裏之寒熱。中而有力無力。是知表裏緩急。脈有浮沉虛實。證乃傳變不常。治之之法。先分表裏寒熱陰陽虛實。標本。先病爲本。次病爲標。先以治其急者。此爲上工。問證以知其外。察脈以知其內。全在活法二字。不可拘於日數。但見太陽證在直攻太陽。但見少陰證在直攻少陰。但見真寒直救真寒。但見三證具。便作主張。不必悉具。當如何處治。此爲活法。若同而異者。明之。似是而非者。辯

之。在表者汗之散之。在裏者利之下之。在上者因而越之。下陷者升而舉之。從乎中者和解之。直中陰經者溫補之。若解表不開。不可攻裏。日數雖多。但有表證而脈浮者。尙宜發散。此事不明。攻之爲逆。經云一逆尙引日。再逆促命期。若表證解而裏證具者。不可攻表。日數雖多。但有裏熱證。而脈沉實者。急當下之。此事不明。禍如反掌。經云邪熱未除。復加燥熱。抱薪積火矣。如直中陰經真寒證。然無熱惡寒。不渴。急宜溫補。切禁寒涼。此事不明。殺人甚速。經云非徒無益而反害之。陰證似陽者溫之。陽證似陰者下之。陽毒者分輕重下之。陰毒者分緩急溫之。陽狂者下之。陰厥者溫之。濕熱發黃者利之下之。血證發黃者清之下之。發斑者清之下之。譫語者下之。溫之。痞滿者消之。瀉之。結胸者解之下之。太陽證似少陰者溫之。少陰證似太陽者汗之。衄血者解之。止之。發喘者汗之下之。咳嗽者利之。解之。正傷寒者大汗之大下之。感冒暴寒者微汗之。微下之。勞力感寒者溫散之。溫極病者微解之大下之。此經常之大法也。有病一經已用熱藥。而又用寒藥。如少陰證。用白虎湯。四逆散。寒藥者。少陰證。用四逆湯。真武湯。熱藥者。庸俗狐疑。詎能措手哉。嗚呼。能盲傷寒之證名。而得傷寒之方脈。如此親切。乃爲良醫。是知寒藥治少陰。乃傳經熱證也。是知熱藥治少陰。乃直中陰經之寒證也。辨名定經。明脈識證。驗證用藥。真知在表而汗。真知在裏而下。真知直中陰經而溫。如此而汗。如彼而下。又如彼而溫。辛熱之劑。投之不差。寒涼之藥。用之必當。病奚逃乎。須分輕重緩急。老少虛實。久病新發。婦人胎產。室女經水。大凡有胎產而傷寒者。不與男子傷寒同治法。無胎產者治相同。婦女經水適斷適來。寒熱似瘧者。卽是熱入血室。但當和解表裏。久病者過經不

解壞證也。新發者始病也。老者血氣衰。少者血氣壯。緩者病之輕。急者病之重。寒藥熱服。熱藥涼服。其中和之劑。溫而服之。戰汗分爲四證。要知邪正盛衰。類傷寒四證。照常法則治之。雖云發蒙。實登仲景之梯階也。余雖專傷寒科。必出乎庸俗誇誕之醫。萬萬且余一生所蓄肺腑家祕。語句方法。俱已備載發揮。窺我門牆者。雖有多人。然片言不繁之要。不得再四經目講明。故述啓蒙捷法。脈要貫珠數。一一開註。明白所示。自宜謹慎深密。勿授受於非人。毋輕泄於澆薄。莫負我之用心耳。

一提金六經證治捷法

太陽經見證法

頭項痛。腰脊強。發熱。惡寒。惡心。是足太陽膀胱經受證。假如先起惡寒者。本病已後發熱者。標病。若有一毫頭痛。惡寒。身熱。不拘日數多少。便宜發散。自然熱退身涼。有何變證。

辯證法

表虛自汗者。爲風傷衛氣。宜實表。
表實無汗者。爲寒傷榮血。宜發表。

診脈法

脈浮緊有力。爲傷寒。
脈浮緩無力。爲傷風。

用藥法

冬月正傷寒。用升陽發表湯。卽加減麻黃湯。

冬月傷風。用疎邪實表湯。卽加減桂枝湯。

春秋無汗。用羌活冲和湯發表。有汗。用加減冲和湯實表。

夏月無汗。用神朮湯。有汗。用前加減冲和湯。

陽明經見證法

目痛。鼻乾。不眠。微惡寒。是足陽明胃經受證。假如先起目痛。惡寒。身熱者。陽明經本病。已後潮熱。自汗。譫語。發渴。大便實者。正陽明胃腑標病。本宜解肌。寒宜急下。只看消息用之。

辨證法

目痛。鼻乾。微惡寒。身熱。病在經。

潮熱。自汗。譫語。發渴。便實。不惡寒。病在腑。

診脈法

脈見微洪。爲經病。

脈見沉數。爲腑病。

用藥法

微惡寒。自然目眶痛。鼻乾。不眠者。用柴葛解肌湯。卽加減葛根解肌湯。渴而有汗不解者。如神白虎湯。卽加減白虎湯。

潮熱自汗。譫語發渴。揭去衣被。揚手擲足。斑黃狂亂。不惡寒。反怕熱。大便實者。輕則大柴胡湯。重則三承氣選用。俱在祕方六一順氣湯內。加減治之。

少陽經見證法

耳聾。脇痛。寒熱。嘔而口苦。是足少陽膽經受證。假如先起惡寒。身熱。耳聾。脅痛者。本病已後嘔。而舌乾。口苦者。標病緣膽無出入。傷在半表半裏之間。止宜小柴胡一湯加減。和解表裏。治之。再無別湯。本方自有加減法。此經有三禁。不可汗。下。吐也。若治之得法。有何壞證。常須識此。宜當審焉。

辯證法

耳聾。脇痛。寒熱。嘔而口苦。舌乾。便屬半表半裏證。不從標本。從乎中治。

診脈法

脈見弦數。本經證。

用藥法

耳聾。脇痛。寒熱。嘔而口苦。舌乾者。用柴胡雙解飲。卽加減小柴胡湯。

太陰經見證法

腹滿。自利。津不到咽。手足溫者。是足太陰脾經受證。假如先起腹滿。咽乾者。本病已後。身目黃。標病。內有寒熱所分。不可混治。臨病之際。用在得宜。

辯證法

腹滿。咽乾。發黃者。屬腑熱。

自利。不渴。或嘔吐者。屬臟寒。

診脈法

脈見沉而有力。宜當下。

脈見沉而無力。宜當溫。

用藥法

腹滿。咽乾。手足溫。腹痛者。桂枝大黃湯。即加減桂枝湯。身目黃者。茵陳大黃湯。即加減茵陳湯。自利。不渴。或嘔吐者。加味理中飲。即加減理中湯。重則回陽救急湯。即加減四逆湯。

少陰經見證法

舌乾口燥。是足少陰腎經受證。假如先起舌乾口燥者。本病已後。譫語。大便實者。標病。至陰經。則難拘定。法。或可溫。而或可下。因分直中者。寒證。傳經者。熱證。是其發前人之所未發也。

辯證法

大要口燥舌乾渴而譫語大便實者知其熱須詳嘔吐瀉利不渴或惡寒腹痛者別其寒。

診脈法

脈見沉實有力宜當下。

脈見沉遲無力宜當溫。

用藥法

口燥咽乾渴而譫語大便實或遶臍硬痛或下利純清水心下硬痛者俱是邪熱燥屎使然急用六乙順氣湯分輕重下之即承氣湯有加減法無熱惡寒厥冷踈臥不渴或腹痛嘔吐瀉利沉重或陰毒手指甲唇青嘔逆絞痛身如被杖面如刀刮戰慄者俱是寒邪中裏使然急用回陽救急湯溫之即四逆湯有加減法。

厥陰經見證法

煩滿囊拳者是足厥陰肝經受證假如先起消渴煩滿者本病已後舌卷囊縮者標病亦有寒熱兩端不可概作熱治。

辨證法

煩滿囊拳消渴者屬熱。

口吐涎沫不渴厥冷者屬寒。

但癆不嘔。清便必自愈。

診脈法

脈沉實者。宜當下。
脈沉遲者。宜當溫。
脈浮緩者。病自愈。

用藥法

消渴煩滿。舌卷囊縮。大便實。手足乍冷乍溫者。急用六乙順氣湯下之。卽承氣湯。有加減法。口吐涎沫。或四肢厥冷不溫。過乎肘膝。不渴。小腹絞痛。嘔逆者。急用茱萸四逆湯溫之。卽回陽救急湯。自有加減法。

一提金脈要

或人問曰。治傷寒先明脈證。脈證不明。取方無法。脈證既明。工中之甲。夫脈之一字。實先天後天之造化。何爲先天。何爲後天。何爲脈也。答曰。人之陰陽。卽爲先天。人之氣血。卽爲後天。脈者非血非氣。乃血氣之先。卽營行之道路。又問曰。旣知先後天之脈理。須明持脈之要。曰。舉。曰。按。曰。尋。三字。若此不明。則陰陽表裏虛實。何以別之。持脈者。輕手循之。曰。舉。重手取之。曰。按。不輕不重。委曲求之。曰。尋。初持輕手候之。脈見皮膚之間。便得。曰。浮。是太陽經脈也。有力者。主寒。邪在表。無汗。爲寒傷榮血。表實者。宜汗之。無力者。主風。邪在表。有汗。爲風傷衛氣。表虛者。宜實之。脈附於肌肉之下。筋骨之間。而得。曰。沉。是三陰經脈也。其三陰

俱是沉脈。妙在指下有力無力中分。有力者主熱邪在裏爲裏實。宜下之。無力者主寒邪中裏爲裏虛。宜溫之。不輕不重中而取之。乃得其脈。應於血肉之間。陰陽相半。若見微洪。是陽明經脈也。主邪在表多裏少。宜解肌。若見弦數。是少陽經脈也。主邪在半表半裏。宜和解。前之所云陰陽表裏虛實寒熱。俱在浮中沉三脈。有力無力中分。有力者爲陽。爲實。爲熱。無力者爲陰。爲虛。爲寒。若浮沉中之不見。則委曲而求之。若隱若見。則陰陽伏匿之脈也。三部皆然。或曰君之了然。非庸俗所能識也。其三脈中有進退焉。有伏脈焉。有可解不可解焉。有欲至焉。有燥亂焉。請備言其所由。答曰。脈大者爲病進。大則邪氣勝。而正氣無權。脈緩者爲邪退。緩則胃氣和。而邪氣無權。何謂伏脈。一手無脈曰單伏。兩手無脈曰雙伏。若病初起。頭痛發熱。惡寒。而脈伏者。緣陰邪陷於陽中。不得發越。此欲汗而當攻之。使邪氣退。而正氣復。脈自至。而病自除。如欲雨。則天鬱熱。晴霽。天乃反涼之可見也。若七八日以來。別無刑尅證候。或昏冒不知人事。或脈全無者。此欲汗而勿攻之。如六合陰晦。雨後庶物皆甦。換陽之吉兆也。何謂可解不可解。脈浮緩在表者。以汗解之。脈沉實在裏者。以下解之。脈沉遲在裏者。以溫解之。且夫浮汗沉下而溫。固其宜也。然浮宜下。沉宜汗。其故又何耶。答曰。浮而下者。因大便難也。設使大便不難。豈敢下乎。沉而汗者。因表有熱也。設使身不發熱。豈敢汗乎。何謂歇至。如寒邪直中陰經。溫之而斷續者。爲歇至。何謂燥亂。因汗下後脈當靜。今反盛者。曰燥亂。大凶之兆也。然則君之言有所據乎。吁。難言也。此出經常大法之格語也。客欣然起而謝曰。予雖白首無窮。生平仰慕。不意邂逅。幸獲開予茅塞。正謂鼯鼠而發千鈞之弩。甚所不當。可謂切而磋琢。

而磨者也。較今庸俗實醜雞坎蛙。不知甕外之有天。井外之有海耳。感君發明于後。豈非再來人乎。遂筆錄以示之。

提金貫珠數

交霜降至春分。冬月發者。爲正傷寒。表證見者。用辛熱之藥。大發汗。裏證見者。用寒涼之藥。急攻下。此與非時傷寒不同。治方論開的本槌法中。不再錄。

交春分至夏至前。有頭疼發熱。不惡寒而渴者。爲溫病。用辛涼之藥。微解肌。不可大發汗。裏證見者。用寒涼之藥。急攻下。若誤下之。未必爲害。誤汗之。變不可言。當須識此。三月後得此證者。爲晚發。治法同。表證不與冬時正傷寒同治法。裏證治相同。方論開在的本槌法中。不再錄。

交夏至後。有頭疼發熱。不惡寒而渴。此名溫病。愈加熱者。名熱病。止用辛涼之藥。微解肌。不宜大發汗。裏證見者。止用大寒之藥。急攻下。表證不與正傷寒同治法。裏證治相同。方論開在的本槌法中。不再錄。

及秋至霜降前。有頭疼發熱。不惡寒。身體痛。小便短者。名溫病。亦用辛涼之藥。加燥劑以解肌。亦不宜大發汗。裏證見者。用寒涼藥。急攻下。表證不與正傷寒同治法。裏證治相同。方論開在的本槌法中。不再錄。

其春夏秋三時。有患頭疼。身熱。亦有惡寒者。卽是感冒。非時暴寒之輕。非比冬時正傷寒之重。俱用辛涼之劑。小發汗。若裏證見者。用寒涼之藥。急攻下。表證不與正傷寒同治法。裏證治相同。方論開在的本槌

法中。不再錄。

其四時有患頭疼發熱惡寒身體倦痛骨腿酸疼自汗出口微渴脈空浮大而無力名勞力感寒證當用溫涼之劑溫經散寒切禁大發汗裏證見者中和之劑加轉藥微下之不可急攻利方論開在的本槌法中不再錄。

其四時有患頭疼身熱惡寒老幼相傳者名時疫證用辛涼之藥微解表裏證見者急攻下從病制宜不與正傷寒同治法方論開在的本槌法中不再錄。

若先起頭疼發熱惡寒已後傳裏頭疼惡寒皆除而反怕熱發渴譫語或潮熱自汗大便不通或揭去衣被揚手擲足或發斑黃狂亂此爲陽經自表傳入陰經之熱證俱當攻裏下之設或當下失下而變出手足乍冷乍溫者因陽極發厥卽陽證似陰名陽厥急當下之又有失於汗下或本陽證誤投熱藥使熱毒入深陽氣獨盛陰氣暴絕登高而歌棄衣而走罵詈叫喊燥渴欲死面赤眼紅身發斑黃或下利赤黃六脈大名陽毒發斑證用酸苦之藥令陰氣復而大汗解矣如大便實者又當大寒之藥下之此與發狂不同治方論開在的本槌法中不再錄。

若初病起無頭疼無身熱就怕寒厥冷腹痛嘔吐瀉利不渴蹇臥沉重戰慄脈沉細此爲直中陰經真寒證不從陽經傳來當用熱藥溫之如寒極而手足厥冷過乎肘膝者因寒極發厥名陰厥急當救裏溫之此與陽厥不同治又有初病起外感寒邪內傷生冷內既伏陰內外皆寒或本真陰誤投涼藥使陰氣獨盛陽氣暴絕以致病起手足厥冷腰背強重頭眼眶痛嘔吐煩悶下利腹痛身如被杖六脈沉細湯飲

不下。已後毒氣漸深。入腹攻心。咽喉不利。腹痛轉甚。心下脹滿。結硬如石。燥渴欲死。冷汗不止。或時鄭聲。指甲面色青黑。速灸關元氣海。須服大熱之劑。溫之。此名陰毒。令陽氣復而大汗解矣。

若夏月大發熱。頭疼燥渴。背惡寒。微汗。脈虛無力。口齒燥者。名中暑。用寒涼之劑。清之。方論開在雜證中。不再錄。

若病人身微熱。煩燥。面赤戴陽。欲坐臥於泥水井中。脈來沉細無力。此陰發燥。名陰燥。當用辛熱之藥。溫之。不宜涼劑。誤用之。其燥急渴甚。必死矣。若病人身冷。脈沉細而疾。雖煩燥。不欲傾水入口者。此名陰盛格陽。亦用大熱之劑。溫之。方論開在的本槌法中。不再錄。

一傷寒失於汗下。使熱邪傳裏。燥渴譫語。小水自利。大便黑。小腹硬痛。或身黃。是下焦畜血。如狂證。此與陽狂不同治。宜下盡黑物則愈。方論開在的本槌法中。不再錄。

一傷寒初得病。與表熱。但狂言煩燥不安。精采不與人相當。此因熱結膀胱。其人如太陽經之裏證也。自有太陽經之裏藥治。不與陽狂同治法。方論開在的本槌法中。不再錄。

一傷寒小水不利。大便實。小腹滿。燥渴譫語。怕熱。身目黃。此名濕熱發黃。輕則疎利。重則大下。此與血證發黃不同治。方論開在的本槌法中。不再錄。

一傷寒失於汗下。血熱不散。故成發斑。大抵不宜發汗。輕則化之。重則下之。起於胸腹。先紅後赤者。曰發斑。起於手足。先紅後黃者。曰蚊迹。臨病之際。宜詳審焉。方論開在的本槌法中。不再錄。

一傷寒少陰證。惡寒發熱。無頭疼。誤以大發汗。使血從耳目口鼻中出者。名陰血。多不治。此與鼻衄陽血不同治。方論開在的本槌法中。不再錄。

一傷寒太陽證。發熱惡寒。頭痛。或微喘。鼻中出血者。爲衄血。名陽血。須分點滴成流。此與陰血不同治。方論開在的本槌法中。不再錄。

一傷寒失於汗下。邪熱傳裏。使水涸糞燥。大便不通。必發譫語。或心下硬痛。下利純清水。燥渴。口出無倫語。亦譫語。凡此皆實。當寒涼之劑下之。又有汗多亡陽。或下後利不止。身疼痛。或自利清穀。譫語者。凡此皆虛。當辛熱之劑溫之。此與狂言相類。方論開在的本槌法中。不再錄。

一傷寒餘熱不除。蘊在心跳。使精神短少。冒昧昏沉。睡中言語一二句者。名獨語。宜涼劑清之。此與譫語不相類。方論開在的本槌法中。不再錄。

一傷寒因汗下後。正氣虛。而本音失。則鄭重語散。不知高下。大小便自利。手足冷。名鄭聲。宜中和之劑治之。此與獨語不相類。方論開在的本槌法中。不再錄。

一傷寒差後。交接淫慾。無病人。反得病者。名陰陽易。宜清涼解毒之劑治之。此與女勞復不相類。方論開在的本槌法中。不再錄。

一傷寒差後。交接淫樂。不因易。自病復發者。名女勞復。與前陰陽易同治法。方論開在的本槌法中。不再錄。

一傷寒失於汗下。或因汗下後虛。令人氣逆。不相接續者。名短氣。分虛實治之。此與喘證不相類。方論開在的本槌法中。不再錄。

一傷寒失於汗下。或因飲水過多。令人擡肩。擗肚。氣逆上者。名發喘。分表裏水氣治之。此與短氣不相類。方論開在的本槌法中。不再錄。

一傷寒麻黃湯證。誤下之。心下滿悶不痛者。名痞氣。分虛實治之。此與結胸不相類。方論開在的本槌法中。不再錄。

一傷寒桂枝湯證。誤下之。心下滿硬而痛。名結胸。分緩急治之。此與痞滿不相類。方論開在的本槌法中。不再錄。

一傷寒證病。一陽經。或三陽經。同病不傳者。名合病。分在經過經治之。此與併病不相類。方論開在的本槌法中。不再錄。

一傷寒證。一陽經先病未盡。又過一經之傳者。名併病。分在經在腑治之。此與合病不相類。方論開在的本槌法中。不再錄。

一傷寒或汗下大過。或恣飲冷水。水寒相搏。虛逆。聲濁惡而長。名噦。此與乾嘔不相類。輕則和解疎利。重則溫散。方論開在的本槌法中。不再錄。

一傷寒熱在胃口。與谷氣併。熱氣上薰無物。名乾嘔。分實熱水氣治之。此與噦證不相類。方論開在的本

槌法中不再錄。

一傷寒有頭疼發熱惡寒脈沉。此名太陽脈似少陰。當辛溫之劑散之。與少陰證不相類。方論開在的本槌法中不再錄。

一傷寒無頭疼。止則發熱惡寒脈沉。此名少陰證似太陽。當辛溫之劑散之。與太陽證不相類。方論開在的本槌法中不再錄。

一傷寒頭疼惡寒身熱者。名表熱。以辛散之。與裏熱不相類。方論開在的本槌法中不再錄。

一傷寒與頭疼無惡寒。反怕熱燥渴。口苦舌乾。譫語大便實。名裏熱。此與表熱不相類。方論開在的本槌法中不再錄。

一傷寒頭疼身熱惡寒者。名表惡寒。當辛甘散之。此與裏惡寒不相類。方論開在的本槌法中不再錄。

一傷寒無頭疼無身熱而惡寒厥冷。踈臥不渴。或吐瀉腹痛。戰慄者。名裏惡寒。當辛熱之劑溫之。此與表惡寒不相類。方論開在的本槌法中不再錄。

